

Misa San Francisco cu reglanan pa protehe e Pro-Catedral recien renoba



ORANJESTAD(AAN): Mirando e inversion grandi cu a worde haci den e Pro-Catedral San Francisco na Playa ta importante pa protehe esaki tambe sin problema pa 200 aña mas.

E renovacion awe ta danki na e inversion di parokianonan mes y pesey algun regla lo ta di sumo importancia. Mas bien ta pidi tur e parokianonan pa duna un man cu e mantencion di e misa. Ta pidi tur hende pa considera nan mes como miembro di e comision di mantencion.

Kier mantene e misa den e estado actual sigur pa 200 aña mas. Ta recorda y informa tur hende cu ta prohibi pa drenta misa cu bals, cos di bebe of come inclui awa. Esaki ta conta pa tur e ceremonianan cu por tin den misa tambe manera entiero, casamento, bautismo etc.

Pa motibo di daño cu belanan a haci na murayanan di misa no ta acepta bela mas den misa. Pastoor a tene bon cuenta cu importancia di bela y deseo di nos rumannan ta pesey ta informa cu pronto

lo tin bela electronico den misa. Pa habri of sera bentana mester primi boton cu tin na e man di e bentanan.

Pastoor ta informa cu tin persona encarga pa habri y sera bentanan di misa. Pa loke ta e kapel di santonan por haya esaki na e kapel pazuid di e misa. Kapel lo ta habri tur dia pa 5or di atardi cu excepcion di dialuna y diamars. Pa por drenta e Kapel mester pasa for di porta pazuid situa den cura di school. Ta prohibi pa drenta of sali di kapel via altar.